



Nart e Juine no vevin fîs, a vivevin bessôi in chês cjasononis di une volte, cu la stale tacade e une braide grandonone ator, il lavôr, al jere tant che si voleve , e cussì a pensarin ben di cjatâ un aiût.

In paîs e viveve une puare femenute vedue di non Nine, cuntun frutin di cressi di non Gjovanin e cence nissun jutori socjâl, Juine i demandà se e jere contente di lâ a vivi cun lôr par dâ une man, e che lôr a varessin providût al manteniment, prometint ancje di fâ studiâ il piçul fintremai al conseguiment di une laurea a sô siele. Nine e fasè bon acet de propueste e dut al leve ben in chês famee. Une dì Nine dopo tancj agns di bon servizi si inmalà e dopo un mêis di ospedâl il bon Diu le cjolè cun se. Gjovanin si jere penis laureât, inzegnâr aereonautic cun plens vôts, e la scuele, cjaland li sôs capacitâts lu proponè par un lavôr intes Americis. Il displasê di lassâ Juine e Nart, che aromai ju clamave mame e papà, al jere grant, ma lôr lu lassarin fâ le sô siele se pûr cul cûr a tocs. Dopo di chês volte Nart e Juine a venderin dute le colonie, tirant indenant i ultims agns, di rendite. Gjovanin, dopo tant timp ch'al jere in meriche, no ju veve dismenteâts e ur scriveve di spes, ma dopo jentrât in servizis segrets di fate militâr nol podè plui fâi savê nie di se; immaginâsi il displasê di

Juine e Nart. L'Europe e jere za di cuatri agns in vuere e lis robis no levin trop ben. Disore le braide si viodevin spes a passâ avions, e tal ultim cun stemis americanis. Une dì a vioderin a passâ un bas bas, scuasit di sdrumâ le nape, e cuant al jere su la braide al butà ju une cassele. Nart al corè subit a viodi: cul colà si jere rote e ator ator e jere une sdrume di scjatulis di cjâr, spagnolets, cjocolate e milante bens di Diu. Podês dome imaginâ le contentece dai doi vielis, e cheste robe si ripeteve ogni altri dì. Aromai chel avion lu cognossevin: al veve un numar e une letare sui flancs. Une brute dì si scuintrà cuntun avion todesc, e li a scomençarin a combatisi, fat al sta che il merecan al ve le piês, e colpît il motôr al cirì di aterâ te braide, ma al sbatè cuintri un rôl sfracassantsi. Nart e Juine a rivarin di corse vaint par salvâlu, lis flamis a vevin za cjapade le gabine, a vioderin di dongje il pilote, sul gjubin a veve scrit Jhon, e plui sot Gjovanin. Lis flamis no ju fermarin e vaint a ciririn di tirâlu fûr, ma il fâc le ve vinte su duçj trê. Chel rôl lu vevin plantât Nart e Gjovanin in chel dì che a vevin soterât le so mame. Sot di chel rôl trê crôs di len a son stadis fin pôcs agns indaûr, e il rôl inte so sdramassade al veve tornât a svilupâ i ramaçs fasintlu sameâ a une grande crôs.

Lis redinis dal destin a àn volût che le vite eterne le polsassin duçj cuatri insiemit.

*di Luciano Marinig*

